

# Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat

Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi § 32, imm. 4, § 34, imm. 2 aamma 3 aamma §57, imm. 4 aamma 6 naapertorlugit aalajangersarneqarput:

## Kapitali 1

### Nalinginnaasumik

#### *Paaqqinniffit immikkoortortaqarfilla ilusaat*

**§ 1.** Meeqqanut ulloq unnuarlu paaqqinniffit pigineqarlutillu ingerlanneqarsinnaapput:

- 1) Naalakkersuisunit,
- 2) kommunalbestyrelsimit imaluunniit kommunalbestyrelsinit arlaqartunit ataatsimoorussamik, imaluunniit
- 3) suliffeqarfinit imminut pigisunit.

*Imm.2. Ulloq unnuarlu paaqqinniffik ingerlanneqarsinnaavoq:*

- 1) isumannaallisagaanngitsutut,
- 2) isumannaallisagaanngitsutut ilaatigulli matoqqasumik initialittut, imaluunniit
- 3) isumannaallisakkatut.

**§ 2.** Meeqqanut ulloq unnuarlu paaqqinniffimi ini ilaatigut matoqqasoq tassaavoq, isumaginninnermik suliassaqfimmi pissaanermik atuineq pillugu Inatsisartut inatsisaanni § 6-imi piumasaqaatit naammassineqarsimatillugit, matut silarliit igalaallu parnaarlugit kiisalu timikkut aalajangerlugit il.il. piffissat ilaanni anitsaliuilluni isersimatitsivik.

**§ 3.** Meeqqanut ulloq unnuarlu paaqqinniffik isumannaallisagaq tassaavoq ulloq unnuarlu paaqqinniffik isumannaallisakkamik minnerpaamik ataatsimik immikkoortortalik, immaqalu isumannaallisagaanngitsumik ataatsimik arlalinnilluunniit immikkoortortalik.

*Imm. 2. Ulloq unnuarlu paaqqinniffimi isumannaallisagaasumi matut silarliit igalaallu parnaaqqatittuaannarneqarsinnaapput.*

*Imm. 3. Ulloq unnuarlu paaqqinniffiup isumannaallisagaasup silataani silaannarissarluni ane erfissanik isumannaallisagaasunik peqassaaq.*

#### *Katsorsaariaatsit pilersaarusi ornerillu*

**§ 4.** Ulloq unnuarlu paaqqinniffik meeqqanut perorsaanermik, tarnip pissusaanik, tarnip nappaataanik imaluunniit ilaqtariittut katsorsaanermik neqerooruteqarsinnaavoq.

*Imm. 2. Ulloq unnuarlu paaqqinniffik nittartagaliussaaq, tassani allassimassaaq, katsorsartinnerit qanoq ittut neqeroorutigineqarnersut, taakku ataanni qanoq iliorluni katsorsaasoqartarnersoq, katsorsaariaatsit suut toqqarneqarsimanersut aammalu qanoq naammassineqartarnersut.*

*Imm. 3. Ulloq unnuarlu paaqqinniffimi perorsaariaaseq meeqqat ataasiakkaat inerissimassusiat immaqalu piginnaasaasa apparsimanerat eqqarsaatigalugit aaqqissunneqassaaq.*

*Imm. 4. Meeqqanut ulloq unnuarlu paaqqinniffik meeqqat sapinggisamik nalinginnaanerpaamik inuuneqarsinnaanngorlugit aaqqissugaallunilu ingerlanneqassaaq.*

#### *Qitiusumik Inissiinissamut Innersuussisarfik*

**§ 5.** Naalakkersuisut qitiusumik inissiinissamut innersuussisarfimmik ingerlatsissapput.

*Imm. 2. Inissiinissamut innersuussisarfimmut nalunaarsinnaassagaanni taassuminngalu atuisinnaassagaanni ulloq unnuarlu paaqqinniffittut akuerisaasimanissaq piumasaqaataavoq.*

*Imm. 3. Meeqqanik ataasiakkaanik inissiinissamik innersuussineq ulloq unnuarlu paaqqinniffit ataasiakkaat aqutsisuinik oqaloqateqarnikkut pissaaq.*

*Imm. 4. Kommune nammineq pisaminik ingerlataminillu ulloq unnuarlu paaqqinniffimmik misissuissaguni, Qitiusumik Inissiinissamut Innersuussisarfimmut allakkatsigut paassisutissiissaq. Paassisutissiineq imaqassaaq:*

- 1) meeqqap aqqa,
- 2) meeqqap inuup-normua,
- 3) misissuinermut pissutaasoq
- 4) meeqqamut paassisutissat tunngasut tamarmiusut, aamma
- 5) meeqqamut iliuusissatut pilersaarut nutartigaq.

#### *Najukkami maleruagassat*

**§ 6.** Meeqqanut ulloq unnuarlu paaqqinniffiup najukkami maleruagassiamini piffissat ulloq unnuarlu paaqqinniffimmut pulaarfiusinnaasut killilersinnaavai. Killiliinerli taanna paaqqinniffiup iluani eqqisisimanissaq torersumillu pissusilernissaq eqqarsaatigalugit pisariaqartumit ingasannerussanngilaq.

*Imm. 2. Najukkami maleruagassat najugarisap siunertaanut naleqqussagaassapput, ulluinnarnilu ingerlanneqarsinnaaneranut akornutaassanatik.*

#### *Ulloq unnuarlu paaqqinniffit aaqqissugaanerat pillugu aalajangersakkat*

**§ 7.** Meeqqanut ulloq unnuarlu paaqqinniffik meeraq nammineq ineeraqartussanngorlugu aaqqissugaassaaq.

*Imm. 2. Meeqqap ineeraa meeraq sapinggisamik peqatigalugu aaqqissunneqassaaq, pisatsersugaaneralu meeqqap ukiuinut immaqalu immikkut pisariaqartitaannut naleqquttuussalluni.*

*Imm. 3. Meeqqat uffarfissaqassapput, perusuersartarfefeqassallutik kiisalu ininik isersimaarfissaqassallutik.*

*Imm. 4. Ulloq unnuarlu paaqqinniffik meeqqat sunngiffimminni sammisaqarnissamut periarfissaqartillugit aaqqissugaassaaq.*

*Imm. 5. Meeqqanut ulloq unnuarlu paaqqinniffik ataatsimoorussamik isersimaartarfefeqassaaq, ini*

meeqqat immikkut pisariaqartitaannut naleqqussarlugu aammalu meeqqanit ulloq unnuarlu paaqqinniffimi inissinneqarsimasunit tamaginnit atorneqarsinnaasunngorlugu, ilusilersugaasumik.

**§ 8.** Ulloq unnuarlu paaqqinniffik sinittussanik pigaartoqartarpalini sulusut qasuerfissaat sulusunut perusuersartarfittalik sulusunullu uffarfittalik aaqqissuunneqassaaq.

**§ 9.** Meeqqanut ulloq unnuarlu paaqqinniffiup aaqqissugaanera imaassaaq, sanaartornermut qatserisartoqarnermullu oqartussaasunit, uumasut nakorsaattut oqartussaasunit kiisalu sullivinnik nakkutilliisoqarfimmit qaqugukkulluunniit akuerineqarsinnaassalluni.

## Kapitali 2

*Meeqqanut ulloq unnuarlu paaqqinniffit Naalakkersuisunit pigineqarlutillu ingerlanneqartut  
Ileqqoreqqusaq*

**§ 10.** Meeqqanut ulloq unnuarlu paaqqinniffit Naalakkersuisunit pigineqarlutillu ingerlanneqartut ileqqoreqqusaqassapput, imarissallugit:

- 1) Ateq, najugaq aamma siunertaq.
- 2) Perorsaanissap siunertaata allaaserineqarnera.
- 3) Sullinniakkat allaaserineqarnerat.
- 4) Aqutsisut suliassaasa allaaserineqarnerat.
- 5) Inummut pingajuusumut tunngatillugu akisussaaneq iliuuseqarsinnaatitaanerlu pillugit maleruagassat.
- 6) Missingersuusiortarneq, naatsorsuuserineq kukkunersiuinerlu pillugit maleruagassat.
- 7) Ileqqoreqqusat allangngortinnejassatillugit periaassisat.

### *Ulluinnarni aqutsineq*

**§ 11.** Naalakkersuisut meeqqanut ulloq unnuarlu paaqqinniffinni Naalakkersuisunit pigineqarlutillu ingerlanneqartuni pisortanik atorfinititsisarlutillu soraarsinnaapput.

*Imm. 2. Pisortap ulloq unnuarlu paaqqinniffiup ulluinnarni ingerlanneqarnera isumagissavaa.*

*Imm. 3. Pisortap ulloq unnuarlu paaqqinniffimmi sulusuusut allat, inatsisit isumaqtigiiusillu atuuttut naapertorlugit atorfinitittarlugillu soraarsissinnaavai.*

## Kapitali 3

*Meeqqanut ulloq unnuarlu paaqqinniffit kommunalbestyrelsimit imaluunniit kommunalbestyrelsinit  
peqatigiifftut pigineqarlutillu ingerlanneqartut  
Akuersisinnaanermut piginnaatitsineq piumasaqaatillu*

**§ 12.** §§ 13-16 naapertorlugit Naalakkersuisut meeqqanut ulloq unnuarlu paaqqinniffinnut, kommunalbestyrelsimit ataatsimit imaluunniit kommunalbestyrelsinit arlalinnit kattulluni ingerlanneqartunut, akuersissummik qinnuteqartoqarnerani, ulloq unnuarlu paaqqinniffiup akuerineqarnissamut piumasaqaatinik naammassinninneranik naliliineq tunngavigalugu aalajangiissapput.

*Imm. 2. Imm. 1 naapertorlugu akuersissut tunngavilersugaasoq allakkatigut nalunaarutigineqassaaq, tassanilu nalunaarutigineqassapput ulloq unnuarlu paaqqinniffiup sullinniagai kikkuunersut, kiisalu qassnik inissaqartitsinersoq.*

*Imm. 3. Imm. 1 naapertorlugu Naalakkersuisut akuersissuteqarnerminnut atatillugu, piumasaqaatinik akuersissut atuutiinnassappat eqquutsinneqartussanik aalajangersaasinnaapput. Naalakkersuisut piumasaqaatinut aalajangersarneqartunut piffissaliussanik ilanggussisinnaapput.*

*Imm. 4. Imm.1 naapertorlugu akuersissut, meeqqat tapersorsorneqarnissaannut Inatsisartut inatsisaanni § 33, imm. 1 naapertorlugu meeqqanut ulloq unnuarlu paaqqinniffiup, communalbestyrelsimit ataatsimit imaluunniit communalbestyrelsinit arlalinnit kattulluni ingerlanneqartup, kommunit qitiusullu inissanik isumaginnittussaaneratulli isumaginninnissaa piumasaqaataavoq.*

**§ 13.** Meeqqanut ulloq unnuarlu paaqqinniffik communalbestyrelsimit imaluunniit communalbestyrelsinit peqatigiinnit pigineqarlunilu ingerlanneqartoq akuerineqassappat, ulloq unnuarlu paaqqinniffiup ataatsimut nalileereernikkut pisariaqartumik pitsaassuseqarnissaa piumasaqaataavoq.

*Imm. 2. Ulloq unnuarlu paaqqinniffiup pitsaassusia tunngavissat makkua aallaavigalugit nalilerneqassaaq:*  
1) Ilinniagaq suliarlu.

2) Namminiissuseq aamma attuumassuteqarfitt.

3) Sullinniakkat, periaatsit angusalu.

4) Aaqqissuussaaneq aqunneqarnerlu.

5) Piginnaasat.

6) Aningaasaqarneq.

7) Initigut periarfissat.

**§ 14.** Ulloq unnuarlu paaqqinniffiup perorsaanermi periaatit aammalu ulloq unnuarlu paaqqinniffiup sullinniagaanut sanilliullugu perorsaanermi anguniagai Naalakkersuisunit § 12 naapertorlugu akuersissuteqarnermut atatillugu, akuerineqassapput.

*Imm. 2. Perorsaanermi periaatsit sulinermi atussallugit illersorneqarsinnaasut, periaatsinit nunatsinni ulloq unnuarlu paaqqinniffinni taamaqqataani atugaasunit allaanerugaluartut, Naalakkersuisunit akuerineqarsinnaapput.*

*Imm. 3. Perorsaanermik periaaseq anguniagaasorlu akuersissummi allaqqassapput.*

**§ 15.** § 12 naapertorlugu sulisut tamarmiullutik inuttut suliamullu tunngatillugu piginnaasaat sullinniakkanut sanilliullugit Naalakkersuisut akuersineranni ilangullugit akuerineqassapput.

*Imm. 2. Naalakkersuisut akuersinarnermi oqartussaasutut sulisuuusut pillugit paassisutissanik, matumani aamma ilinniagaannut tunngasunik aammalu pineqaatissinneqarsimanermut meeqqanillu pi-nerliisimannginnermut uppermarsaatnik, piniarsinnaapput.*

**§ 16.** Ulloq unnuarlu paaqqinniffiup initigut periarfissaasa siunnerfigineqartunut aammalu perorsaanikkut periaatsinut naleqquttuuner Naalakkersuisunit § 12 naapertorlugu akuersissuteqarnermut atatillugu, akuerineqassapput.

**§ 17.** § 12 naapertorlugu ulloq unnuarlu paaqqinniffik akuerineqarnissamik qinnuteqarpat, naliliinissamut atorfissaqartinneqartut suliamut tunngasut, aaqqissuussaanermet aningaasaqarnermullu paassisutissat naalakkersuisunit piumasarineqarpata tunniutissavai.

*Imm. 2. Ulloq unnuarlu paaqqinniffik nammineq ingerlatsinermut akuersinermi tunngaviusunik allannguiteqartitsissaguni Naalakkersuisunut nalunaarutigissavai.*

### *Ileqqoreqqusaq*

**§ 18.** Meeqqanut ulloq unnuarlu paaqqinniffit communalbestyrelsimit imaluunniit communalbestyrelsinit pigineqartut ileqqoreqqusaqassapput, imarissallugit:

1) Ateq, najugaq aamma siunertaq.

2) Perorsaanissap siunertaata allaaserineqarnera.

3) Ulloq unnuarlu paaqqinniffiup sullinniagaasa allaaserineqarnerat.

- 4) Aqutsisut suliassaasa allaaserineqarnerat.
  - 5) Inummut pingajuusumut tunngatillugu akisussaaneq iliuuseqarsinnaatitaanerlu pillugit maleruagassat.
  - 6) Missingersuusiortarneq, naatsorsuuserineq kukkunersiinerlu pillugit maleruagassat.
  - 7) Ileqqoreqqusat allanngortinneqassatillugit periaasissat.
- Imm. 2. Ileqqoreqqusat allannguutaat Naalakkersuisunit akuerineqassapput.*

#### *Akuersissummik atorunnaarsitsineq*

**§ 19.** § 12 naapertorlugu meeqqanut ulloq unnuarlu paaqqinniffimmut, communalbestyrelsimit ataatsimit imaluunniit communalbestyrelsinit arlalinnit kattulluni ingerlanneqartumut, akuersissutip atorunnaarsinnejarnissa Naalakkersuisut aalajangersinnaavaat, ulloq unnuarlu paaqqinnittarfiup akuersissuteqarnissamut piumasaqaataasut eqquutsikkunnaarpagit.

*Imm. 2. Imm. 1 naapertorlugu Naalakkersuisut akuersissutip atorunnaarsinnejarnissa pillugu aalajangiinnginneranni ulloq unnuarlu paaqqinniffik Naalakkersuisunit oqaloqatigineqassaaq. Naalakkersuisut ulloq unnuarlu paaqqinniffik pissutsinik, akuersissummik atorunnaarsitsiniarnermut tunngaviusunik aaqqiiniarnissaanik periarfississavaat.*

*Imm. 3. Naalakkersuisut akuersissutip atorunnaarsinnejarnissa aalajangerpassuk atorunnaarsitsinissamut piffissaq naammaginartumik sivisussusilik Naalakkersuisut aalajangersassavaat. Piffissaliussaq pissutsinik, atorunnaarsitsinissamik aalajangernermetut pissutaasunik naliliineq tunngavigalu aalajangersarneqassaaq.*

**§ 20.** Naalakkersuisut § 19 apeqquaatinngagu akuersissuteqarneq piaarnerpaamik atorunnaarsissinnaavaat, taamaaliornissaq pissutsit immikkut ittut, matumaniaamma iliuutsinik pillarneqaataasinnaasunik pasitsaassaqartoqarnerata imaluunniit meeqqat ulloq unnuarlu paaqqinniffimiittut isumannaatsuunissaasa peqqinnissaasalu ulorianartorsiortinneqaratarsinnaanerisa pisariaqalersippassuk.

**§ 21.** §§ 19-20 naapertorluginet Naalakkersuisut communalbestyrelsit inissiisimasut akuersissutip utertinneqarnera pillugu ilisimatissavai.

*Imm. 2. Akuersissutip utertinneqarnerani, takuuk §§ 19-20, communalbestyrelsit inissiisimasut meeqqat ulloq unnuarlu paaqqinniffimi inississimasamik, inisseqqinnejarnissaat akisussaaffigaat.*

#### *Akuersissuteqarnerup atorunnaartarnera*

**§ 22.** Ulloq unnuarlu paaqqinniffik siunertamut akuerisaasumut piffissami ataannartumi ukiunik marlunnik sivisussuseqartumi atorneqanngippat akuersissut siumut ilisimatitseqeqqaarani atorunnaarsinnejarnissaq.

#### *Atuukkunnaarsitsineq*

**§ 23.** § 12 naapertorlugu akuersissuteqarneq malillugu pisussaaffit annertuumik sumiginnarnejarnissapata, ulloq unnuarlu paaqqinniffiup communalbestyrelsimit ataatsimit imaluunniit communalbestyrelsinit arlalinnit kattulluni ingerlanneqartup ingerlanneqarnerata atuukkunnaarsinnaanik aammalu ulloq unnuarlu paaqqinniffimi pineqartuni nammineq ingerlatsilernissamik Naalakkersuisut aalajangersinnaapput.

*Imm. 2. Atuukkunnaarsitsinissaq pillugu aalajangerneq piffissamut erseqqinnerusumik aalajangersarneqartumut imaluunniit maannamuugallartoq aalajangiiffigineqarsinnaavoq.*

**§ 24.** Kommunalbestyrelsip, imaluunniit kommunalbestyrelsit kattullutik ulloq unnuarlu paaqqinniffimmik ingerlatsisut, aningaasartuutit § 23, imm. 1 naapertorlugu atuukkunnaarsitsinissaq pillugu aalajangernerup malitsigisai, Naalakkersuisunut akilissavaat.

*Imm. 2.* Kommunalbestyrelsi, imaluunniit kommunalbestyrelsit kattullutik ulloq unnuarlu paaqqinniffimmik ingerlatsisut, sulisut Naalakkersuisut ingerlatsinermik tigusineranni atorfeqartut, kiisalu atortorissaarutit atorneqartut Naalakkersuisunut atugassanngortissavaat. Sulisut, ilanngullugit kommunimi tjenestemandit, suliassat atuukkunnaarsitsinermi pineqartunut ilaasut isumagineqarnerannut ilaatillugu Naalakkersuisunit ilitsorsorneqartussaapput.

**§ 25.** Kommunalbestyrelsi, imaluunniit kommunalbestyrelsit kattullutik ulloq unnuarlu paaqqinniffimmik ingerlatsisut, paasissutissat ulloq unnuarlu paaqqinniffiup ingerlanneqarnerata ingerlateqqinnissaanut pisariaqartut Naalakkersuisunut nalunaarutiginissaat pisussaaffigaat.

#### *Ulluinnarni aqutsineq*

**§ 26.** Kommunalbestyrelse ulloq unnuarlu paaqqinniffinni kommunalbestyrelsimit pigineqarlutillu ingerlanneqartuni pisortamik atorfinititsisartuullunilu soraartsitisinnaavoq.

*Imm. 2.* Pisortap ulloq unnuarlu paaqqinniffiup ulluinnarni aqunneqarnera isumagissavaa.

*Imm. 3.* Pisortap ulloq unnuarlu paaqqinniffimmi sulususut allat, inatsisit isumaqatigiissutillu atuuttut naapertorlugit atorfinitittarlugillu soraarsissinnaavai.

### **Kapitali 4**

*Meeqqanut ulloq unnuarlu paaqqinniffit suliffeqarfittut imminut pigisutut ingerlanneqartut  
Akuersisinnaanermut piginnaatitsineq piumasaqaatillu*

**§ 27.** §§ 28 – 41 naapertorlugit Naalakkersuisut meeqqanut ulloq unnuarlu paaqqinniffimmut, ulloq unnuarlu paaqqinniffittut imminut pigisutut ingerlanneqartumut, akuersisummik qinnuteqartoqarnerani, ulloq unnuarlu paaqqinniffiup akuerineqarnissamut piumasaqaatinik naammassinninneranik naliliineq tunngavigalugu aalajangiissapput.

*Imm. 2.* Imm. 1 naapertorlugu, akuersissut allaganngorlugu nalunaarutigineqassaaq tassanilu taaneqassallutik ulloq unnuarlu paaqqinniffiup kikkut sullinniarnerai, qassillu inissaqartinneqarnersut.

*Imm. 3.* Imm. 1 naapertorlugu Naalakkersuisut akuersissuteqarnerminnut atuillugu piumasaqaatinik akuersissut atuutiinnassappat eqquutsinneqartussanik aalajangersaasinnaapput. Naalakkersuisut piumasaqaatinut aalajangersarneqartunut piffissaliussanik ilanngussisinnaapput.

*Imm. 4.* Meeqqat tapersorsorneqarnissaannut Inatsisartut inatsisissaat § 33 imm. 1 naapertorlugu imm. 1 malillugu meeqqanut ulloq unnuarlu paaqqinnittarifiup nammineq pigisup akuerineqarnissaanut piumasaqaataassaaq ulloq unnuarlu paaqqinniffik kommunimi sumiiffimilu ulloq unnuarlu paaqqinniffinnut inissiiffissanut ilaatinneqalissasoq.

#### *Pitsaassutsimik naliliineq*

**§ 28.** Meeqqanut ulloq unnuarlu paaqqinniffik imminut pigisoq akuerineqassappat, ulloq unnuarlu paaqqinniffiup ataatsimut nalileereernikkut pisariaqartumik pitsaassuseqarnissaa piumasaqaataavoq.

*Imm. 2.* Ulloq unnuarlu paaqqinniffiup pitsaassusia tunngavissat makkua aallaavigalugit nalilerneqassaaq:

- 1) Ilinniagaq suliarlu.
- 2) Namminiissuseq aamma attuumassuteqarfuit.

- 3) Sullinniakkat, periaatsit angusallu.
- 4) Aaqqissuussaaneq aqunneqarnerlu.
- 5) Piginnaasat.
- 6) Aningaasaqarneq.
- 7) Initigut periarfissat.

**§ 29.** Ulloq unnuarlu paaqqinniffiup perorsaanermi periaasii aammalu ulloq unnuarlu paaqqinniffiup sullinniaganut sanilliullugu perorsaanermi anguniagai Naalakkersuisunit akuerineqassapput.

*Imm.* 2. Perorsaanermi periaatsit sulinermi atussallugit illersorneqarsinnaasut, periaatsinit nunatsinni ulloq unnuarlu paaqqinniffiup taamaqataani atugaasunit allaanerugaluartut Naalakkersuisunit akuerineqarsinnaapput.

*Imm.* 3. Perorsaanermik periaaseq anguniagaasorlu akuersissummi allaqqassapput.

**§ 30.** Ulloq unnuarlu paaqqinniffiup aqtsisua sulisunik atorfinititsisarneq soraartsitsisarnerlu akisussaaffigaat.

*Imm.* 2. Sulisusut tamarmiullutik inuttut suliamullu tunngatillugu piginnaasaat sullinniakkanut sanilliullugit Naalakkersuisunit akuerineqassapput.

*Imm.* 3. Naalakkersuisut akuersisarnermi oqartussaasutut sulisusut pillugit paassisutissat, matumani aamma ilinniagaannut tunngasunik aammalu pineqaatissinneqarsimannnginnermut meeqlanillu pi-nerliisimannnginnermut uppermarsaataajunnartut piniarsinnaavaat.

**§ 31.** Meeqyanut ulloq unnuarlu paaqqinniffimmik suliffeqarfittut imminut pigisutut ingerlanneqartumik akuerinninnissami piumasaqaataavoq, aqtsisut sulisusullu akissarsiatigut atorfinititsitaanermilu atugarisaasa pisortani taamatut atorfillit atugarisaat assigissagaat.

*Imm.* 2. Ulloq unnuarlu paaqqinniffiup uppermarsaatissat akuersissummik qinnuteqaatip nalilersorneqarnissaani atorneqartussat Naalakkersuisunut saqqummiutissavai.

**§ 32.** Meeqyanut ulloq unnuarlu paaqqinniffiup, ulloq unnuarlu paaqqinniffittut imminut pigisutut ingerlanneqartup, initigut periarfissaasa siunertamut naleqquttuuneri Naalakkersuisunit akuerineqassapput.

#### *Aaqqissuussaanerup akuerineqarnera*

**§ 33.** Ulloq unnuarlu paaqqinniffik imminut pigisoq ingerlatsiviusaaq inatsisit eqqarsaatigalugit namminersortoq aningaasaqarnerlu eqqarsaatigalugu namminersortoq.

*Imm.* 2. Naalakkersuisulli imm. 1-impi piumasaqaat avaqqussinnaavaat:

- 1) ulloq unnuarlu paaqqinniffik meeqyanut ulloq unnuarlu paaqqinniffimmut Kalaallit Nunaanniittumut imminut pigisumut allamut, nalunaarut manna naapertorlugu akuerisaasumut ilannguppat, aamma
- 2) tamanna suliaq eqqarsaatigalugu tunngavissaqarluarpas.

**§ 34.** Meeqyanut ulloq unnuarlu paaqqinniffiinut imminut pigisunut aningaasaateqarfittut pilersinneqarsimasunut, aningaasaateqarfittut peqatigiiffillu ilaat pillugit inatsisip Kalaallit Nunaannut atuutilersinneqarnissaa pillugu peqqusummi aamma aningaasaateqarfittut inuussutissarsiutinik ingerlataqartut pillugit inatsisip atuutilersinneqarnissaa pillugu peqqusummi pineqartunut ilaanngitsunut tunngatillugu, akuersissummi allaqqassaaq, ulloq unnuarlu paaqqinniffik aningaasaateqarfittut inatsisit malillugit pilersinneqarsimasoq.

*Imm.* 2. Meeqyanut ulloq unnuarlu paaqqinniffiit aningaasaateqarfittut pilersinneqarsimasut ileqqoreqqaat Naalakkersuisunit akuerineqassapput.

*Imm. 3. Ileqqoreqqusat akuerineqarsinnaapput pilersitsisup aamma aningasaateqarfiup aningaa-saqarneri immikkoortilluinnarneqarsimappata, aammalu Naalakkersuisut naliliippata aningasaateqarfiup atorunnaarsinneqarnerani aningasaataasa qanoq atorneqarnissaat pillugu ileqqoreqqusani maleruagassat aningasaateqarfiup siunertaanut naapertuuttut.*

*Imm. 4. Aningasaateqarfiup ileqqoreqqusaani allangnuutit aamma aningasaateqarfimmik atorunnaarsitsineq Naalakkersuisunit akuerineqassapput.*

**§ 35.** Meeqqanut ulloq unnuarlu paaqqinniffiup, ulloq unnuarlu paaqqinniffittut imminut pigisutut ingerlanneqartup, siulersuisusa katitigaanerat Naalakkersuisut akuerissanngilaat, taamaattorli takuu imm. 2 aamma imm. 3.

*Imm. 2. Meeqqanut ulloq unnuarlu paaqqinniffiup imminut pigisup aqtsisua, taassuma aappaa, inuilluunniit inunnut taaneqartunut toqqaannartumik ilaquaasut qatanngutaasulluunniit siulersuisuni amerlanerussuteqarsinnaanngillat. Siulersuisut ima katitigaassapput, inuk minnerpaamik ataaseq ulloq unnuarlu paaqqinniffiup aqtsisuanut attuumassuteqassanani aamma aqtsisoq siulersuisuni taaseqataasinnaassanani.*

#### *Missingersuutit naatsorsuutillu*

**§ 36.** Meeqqanut ulloq unnuarlu paaqqinniffiit imminut pigisut akuersisummik qinnuteqartut akuerineqarsimasulluunniit ulloq unnuarlu paaqqinniffiup suliassaasa isumagineqarnissaat pillugu missingersuusiussapput.

**§ 37.** Naalakkersuisut meeqqanut ulloq unnuarlu paaqqinniffiup, ulloq unnuarlu paaqqinniffittut imminut pigisutut ingerlanneqartup, missingersuutai akuerissavaat, sumiiffimmik ingerlataanut naapertuuttuuppata aammalu ulloq unnuarlu paaqqinniffiup, akigitat sumiiffiullu najugaqartinniagaanut sanilliullugu pitsaassusissaanik periarfissiippata. Missingersuutini killiliussat ataatsimut isigalugit akuerineqassapput.

*Imm. 2. Illuutinik aalaakkaasunik attartornermut akiliutinut aningasartuutit, illuutinik taamaaqataannik attartornermi aningasartuutinit nalinginnaasunit annerussanngillat.*

*Imm. 3. Siulersuisuni ilaasortat akissarsiaat suliap suunera suliassallu annertussusiat malillugu nalinginnaasutut isigineqartunit amerlanerussanngillat.*

*Imm. 4. Ulloq unnuarlu paaqqinniffiup goodwillia missingersuutit akuerineqarneranni ilanngunneqarsinnaanngilaq.*

*Imm. 5. Paaqqinniffik imminut pigisoq, meeqqanut ulloq unnuarlu paaqqinniffimmik ingerlatsinerup saniatigut allanik ingerlataqarpat, ulloq unnuarlu paaqqinniffiup ingerlanneqarneranut saniatigullu ingerlatanut immikkoortitanik missingersuusiortoqassaaq.*

**§ 38.** Meeqqanut ulloq unnuarlu paaqqinniffiit imminut pigisut, imminut pigisutut ingerlanneqartut, ukiumoortumik naatsorsuusiortarneq pillugu inatsimmi immikkoortoq 2-mi maleruagassat naapertorlugit ukiumoortumik naatsorsuusiussapput. Ulloq unnuarlu paaqqinniffiup oqimaaqatigiissaarinermi kisitsisaataasa katinnerisa, ilanngaatissat ilanngaatigereerlugit kaaviiartitaasa sulisuisalu agguaqatigiissillugit amerlassusiisa ukiumoortumik naatsorsuusiortarneq pillugu inatsimmi § 4-mi killiliunneqarsimasut sinnerpatigik, ukiumoortumik naatsorsuutit ukiumoortumik naatsorsuusiortarneq pillugu inatsimmi immikkoortoq 3 naapertorlugu suliarineqassapput.

*Imm. 2. Naalakkersuisut ulloq unnuarlu paaqqinniffiit ataasiakkaat naatsorsuusiornissaat pillugu piumasaqaatinik allanik piumasaqaateqarsinnaapput, ulloq unnuarlu paaqqinniffiup aningasaqarnerata paasiuminarluinnartuunissaa pisuni immikkut ittuni pisariaqartutut nalilerneqarpat, ilanngullugu ulloq*

unnuarlu paaqqinniffiup ingerlanneqarneranut immaqalu aamma saniatigut ingerlatanut immikkoortillugit naatsorsuinissamik piumasaqaateqarneq.

**§ 39.** Meeqyanut ulloq unnuarlu paaqqinniffit imminut pigisut naatsorsuutaat kukkunersiuusumit akuerisaasumit kukkunersiorneqassapput.

*Imm. 2.* Naatsorsuutit eqqortuunersut, aningaasanik atuineq naatsorsiornermi pineqartoq aningaasaliissutitut nalunaarutigineqarsimasunut, inatsisinut malittarisassanullu allanut aammalu isumaqatigiissutaasimasunut periaaserineqartunullu naapertuunnersoq, kiisalu naammattusaarnissaq, naammassisaqarnissaq pitsaasumillu sulinissaq aningaasanik aqtsinermi aammalu neqeroorutinik ingerlatsinermi naatsorsuutini pineqartuni anguniarneqarsimanersut kukkunersiuinermi misissorneqasapput.

*Imm. 3.* Ulloq unnuarlu paaqqinniffiup kukkunersiuisuata Naalakkersuisunit qinnuigineqaruni pissutsit kukkunersiuinermi misissorneqarsimasut suuner, aammalu akuersisummut atatillugu piumasaqaatit eququutsinneqarsimanerannik Naalakkersuisut naliliinissaanni pingaarteqartut Naalakkersuisunut nalunaarutigissavai. Kukkunersiuisoq pissutsinik, akuersisummi piumasaqaatit eququutsinneqarsimanerannik kukkunersiuisumik nalornilersitsisunik kukkunersiuinermini paasisaqaruni Naalakkersuisunut tamatuminnga nalunaaruteqassaaq.

*Imm. 4.* Kukkunersiuisoq kukkunersiuinerminut atatillugu ulloq unnuarlu paaqqinniffiup ingerlanneqarneranit sinneqartoorautasimmasinnaasut atorneqarnerannut nassuaassaaq, aammalu illuartitat aamma immikkut ittumik aningaasaqarnikkut aalajangiinerit ulloq unnuarlu paaqqinniffiup siunertaata iluaninnerat qulakkiissallugu. Pissutsinik aalajangiineq ulloq unnuarlu paaqqinniffiup siunertaata iluaninnerosq nalornissuteqalernissamut kukkunersiuisumut pissutissaqalersitsisunik, paasisaqarnermi kukkunersiusup Naalakkersuisut ilisimatissavai.

#### *Nalunaartussaatitaaneq*

**§ 40.** § 27 naapertorlugu meeqyanut ulloq unnuarlu paaqqinniffiup imminut pigisup akuersisummit qinnuteqartup suliamut, aaqqissuussaanermut aningaasaqarnermullu tunngatillugu paasissutissat ulloq unnuarlu paaqqinniffimmut tunngasut Naalakkersuisut qinnutigisaat qinnuteqaatip nalilersoneqarnissaani atugassat Naalakkersuisunut tunniutissavai.

*Imm. 2.* Ulloq unnuarlu paaqqinniffiup pissutsit akuersisummut tunngavigineqartunut sanilliullutik annertuumik allannguuteqarpata tamanna peqquneqaqqaanngikkaluarluni Naalakkersuisunut paasisutissiissutigissavaa, ilanngullugu saniatigut ingerlatanik aallartitsineq.

*Imm. 3.* Naalakkersuisut ulloq unnuarlu paaqqinniffimmut suliffeqarfittut imminut pigisutut ingerlanneqartumut akuersisummit qinnuteqaammik suliaqarnerminnut atatillugu qinnuteqartoq qinnuigisinhaavaat, ulloq unnuarlu paaqqinniffiup ingerlataasa allat, ulloq unnuarlu paaqqinniffiup aningaasaataanik nuussinngikkaluarluni ingerlatiinnarnissaannut akissaqarnini upernarsassagaa.

#### *Ileqqoreqqusat*

**§ 41.** Meeqyanut ulloq unnuarlu paaqqinniffit imminut pigisut ileqqoreqqusaqassapput, imarissallugit:

- 1) Ateq, sumiiffik aamma siunerta.
- 2) Perorsaanissap siunertaata allaaserineqarnera.
- 3) Ulloq unnuarlu paaqqinniffiup sullitassaasa allaaserineqarnerat.
- 4) Pilersitsinermi nammineq aningaasaatit annertussusaa qanorlu akilerneqarsimanera.

- 5) Aqutsisut toqqarneqarnerat suliassaasalu allaaserineqarnerat.
- 6) Inummut pingajuusumut tunngatillugu akisussaaneq iliuuseqarsinnaatitaanerlu pillugit maleruagassat.
- 7) Akiitsunut akiliisussaatitaanermut maleruagassaq.
- 8) Missingersuusiortarneq, naatsorsuuserineq kukkunersiuinerlu pillugit maleruagassat.
- 9) Ileqqoreqqusat allangortinneqassatillugit periaasissat.
- 10) Atorunnaarsitsinermi nammineq aningaasaliissutinik atuinissamut maleruagassat.
- 11) Siulersuisut katitigaanerinut maleruagassaq.

*Imm. 2. Ileqqoreqqusanik allangortitsinerit Naalakkersuisunit akuerineqassapput.*

#### *Akuersissutip atorunnaarsinnejnarnera*

**§ 42.** § 27 naapertorlugu meeqqanut ulloq unnuarlu paaqqinniffiup suliffeqarfittut imminut pigisutut ingerlanneqartup akuersissummi piumasaqaataasut eqquutsikkunnaarpagit, akuersissummik atorunnaarsitsinissaq Naalakkersuisut aalajangersinnaavaat.

*Imm. 2. Naalakkersuisut akuersissut, atorunnaarsitsinissaq sioqqullugu ulloq unnuarlu paaqqinniffimmut imminut pigisumut isumaqatigiinniarneq tunngavigalugu nalilersoqqissavaat.*

*Imm. 3. Ulloq unnuarlu paaqqinniffiup atorunnaarnera pillugu Naalakkersuisut kommunalbestyrelsit inissiisut pisariaqanngitsumik kinguarsaanertaqanngitsumik nalunaarfingissavaat.*

#### *Akuersissuteqarnerup atorunnaartarnera*

**§ 43.** Ulloq unnuarlu paaqqinniffik suliffeqarfittut imminut pigisutut ingerlanneqartoq piffissami ukiunik marlunnik sivisussuseqartumi siunertaminut akuerisaasumut atorneqarsimannngippat akuersissut atorunnaarsinnejnassaaq.

### **Kapitali 5**

#### *Aningaasalersorneqarnera*

**§ 44.** Ulloq unnuarlu akigititaq, communalbestyrelsip inissiisup meeqqanut ulloq unnuarlu paaqqinniffinni, kapitali 2 malillugu Naalakkersuisunit pigineqartuni ingerlanneqartunilu inissiinermut akiligassaa, kommunit, imaluunniit kattuffiup kommunit ataasiakkaat toqqagaata, aamma Naalakkersuisut isumaqatiginninniarnerisigut aalajangersarneqassaaq, taamaalilluni ulloq unnuarlu paaqqinniffiup ingerlatsinermut aningaasartuutai akigititamik akiliutinit tamarmiusunit matussuserneqarsinnaassalluni.

*Imm. 2. Ulloq unnuarlu akigititaq, communalbestyrelsip inissiisup meeqqanut ulloq unnuarlu paaqqinniffinni, kapitali 4 malillugu ulloq unnuarlu paaqqinniffittut imminut pigisutut ingerlanneqartunilu inissiinermut akiligassaa, ulloq unnuarlu paaqqinniffiit ataasiakkaat aamma kommunit, imaluunniit kattuffiup kommunit ataasiakkaat toqqagaata isumaqatiginninniarnerisigut aalajangersarneqassaaq, taamaalilluni ulloq unnuarlu paaqqinniffiup ingerlatsinermut aningaasartuutai akigititamik akiliutinit tamarmiusunit matussuserneqarsinnaassalluni.*

*Imm. 3. Meeqqanut ulloq unnuarlu paaqqinniffiit kommuninit pigineqartut, ulloq unnuarlu paaqqinniffik meeqqanik kommuninit allanit tigusisarsimannngippat, aammalu ulloq unnuarlu paaqqinniffik meeqqanik kommuninit allanit tigusisinnaasoq akuersissummut ilaasimannngippat, kapitali 3 malillugu akuerineqartut imm. 1-imi aamma 2-imi akigititanik aalajangersarneqartuni pineqartunut ilaatinneqanngillat. Taamatut pisoqarsimappat akigititat imm. 1-imi aalajangersakkat naapertorlugit aalajangersarneqassapput.*

*Imm. 4. imm. 1-3 naapertorlugit ulloq unnuarlu akigititami, communalbestyrelsip inissiisup meeqqanut*

ulloq unnuarlu paaqqinniffinni inissiinermut akiligassaani, nalinginnaasumik sulisoqarnermut, nerisaqarnermut, ineqarnermut, kiisalu najugaqartunut kaasarfimmiussanut atisassarsiutissanullu aningaasartuutit ilaatinneqarput.

**§ 45.** Najugaqartup nappaataata imaluunniit pissusilersortarnerata annertuumik ajorseriarnerani kommunalbestyrelsip inissiisup akuersineratigut ulloq unnuarlu akigititaq qaffasinnerusoq akilersinneqarsinnaavoq. Ulloq unnuarlu akigititap qaffasinnerusup akuerineqarsinnaanissaanut tunngaviussaaq, najugaqartoq atugarissaarnerminut, peqqissutsiminut imaluunniit ineriertornerminut ilungersunartumik ajoquisiisinnaaneranik aarlerinaateqartumik pissusilersortartoq, imaluunniit taassuma imaluunniit allat inuunerat imaluunniit aalassarinnerat navianartorsioriginneqartut.

*Imm. 2.* Imm. 1 naapertorlugu ulloq unnuarlu akigititap qaffanneqarnera qaammatit 3-t angullugit akuerineqarsinnaavoq, tamatuma kingorna ulloq unnuarlu akigititap ukiumut aalajangersimasumik qaffanneqarnissaa qinnuteqaatigineqassalluni. Najugaqartumut iliuusissanut pilersaarutip, meeqqat tapersorsorneqarnissaannut Inatsisartut inatsisaanni § 47 naapertorlugu, iluarsanneqarnerani akigititamik aalajangersimasumik qaffasinnerusumik akiliisarnissamut suli tunngavissaqarnersoq aalajangiisoqassaaq.

*Imm. 3.* Imm. 1 naapertorlugu kommunalbestyrelsip inissiisup akigititamik qaffasinnerusumik akiliisarnissaaq, pillugu aalajangiineq Naalakkersuisut allakkatigut ilisimatissavai.

**§ 46.** Meeraq inissinneqartoq iliuusissanut pilersaarut suliarineqartoq naapertorlugu piffissami ulla 14-it sinnerlugit angajoqqaaminiittassappat imaluunniit allaniittassappat, akigititamik akiliuteqarneq aningaasartat nalinginnaasut 85 %-iinut annikillisinneqarsinnaavoq. Akiliisarnerup iluarsineqarnera qaammatip tulliuttup naanerani pisassaaq.

*Imm. 2.* Meeraq ulloq unnuarlu paaqqinniffimmii inissinneqartoq, sunngiffeqarneq, napparsimaneq assigisaaluunniit pissutaallutik sapaatit akunnerinit 2-nit sivisunerusumik paaqqinniffiup avataaniippat, paaqqinniffimmiiittutut suli isigineqassaaq, kisianni piffissamut akigititamik akiliineq aningaasartat nalinginnaasut 85 %-iinut annikillisinneqarsinnaavoq.

*Imm. 3.* Kommunalbestyrelsi inissiisoq efterskoliiminnissaq imaluunniit allatut atuarfimmiinnissaq pillugu aalajangiippat, meeqqap atuarfimmiinnerata naammassinssaa tikillugu, ulloq unnuarlu paaqqinniffik meeqqamut piareersimanerminut akiliummik annikillisamik tigusaqartassaaq.

*Imm. 4.* Kommuni ulloq unnuarlu akigititamik annikillisamik akiliisarpat, akigititami kaasarfimmiussat atisassarsiutissallu ilaatinneqassangillat.

**§ 47.** Meeraq ullup unnuallu ilaannaani meeqqanut ulloq unnuarlu paaqqinniffimmiiippat akiliutit ikilisat akiliutigitinneqassapput, akiliutillu taakku oqartussaasup akiliuteqartartup paaqqinniffiullu akoraanni ataasiakkaarlugit isumaqtigiiutiqtigineqartassapput.

**§ 48.** Paaqqinniffik meeqqamik najugaqarallartussamik inissiivigineqarpat, najugaqarnerup nalaani ulloq unnuarlu akiliutit nalinginnaasut akiliutigitinneqartassapput.

**§ 49.** Inuuusuttut 18-inik ukiulinnit 23-t ilanngullugit ukiullit suliniuteqareernermi malitseqartitsilluni suliniuteqarfigineqartut, meeqqat tapersorsorneqarnissaannut Inatsisartut inatsisaat § 42 naapertorlugu, siusinaartumik pensionisiaqartoq pensionit tunniunneqartarneri pillugit malittarisassat aalajangersarneqarsimasut tunngavigalugit ineqarnerminut akiliuteqartinnejqartassaaq.

**§ 50.** Ulloq unnuarlu paaqqinniffik communalbestyrelsimit immikkut ittumik ikorsiissuteqartaruni, kommuni isumaqtigalugu akiliisissinnaavaa.

*Imm. 2. Imm. 1 malillugu akiliisoqassappat piumasaqaataavoq sioqqullugu immikkut ittumik ikorsiissutit suunerinik akiinillu allakkatigut isumaqatigiissusiortoqassasoq.*

**§ 51.** Meeqcat meeqqanut ulloq unnuarlu paaqqinniffimiinnerinut akiliutit qaammatikkaartumik kingumoortumik akilerneqartassapput.

## Kapitali 6

### *Kaasarfimmiussat atisassarsutiutissallu*

**§ 52.** Kaasarfimmiussat atisassarsutiutissallu ulloq unnuarlu paaqqinniffimmut tunniunneqassapput ullormut unnuamullu ataatsimut akigitinneqartoq aalajangersimasoq Naalakkersuisunit aalajangersarneqartoq malillugu.

**§ 53.** Meeqcat tapersorsorneqarnissaannut Inatsisartut inatsisissaat § 46 naapertorlugu meeqqamut paarineqartumut iliuusissatut pilersaarummi, imaluunniit meeqcat tapersorsorneqarnissaannut Inatsisartut inatsisissaat § 48 naapertorlugu katsorsarneqarnissamik pilersaarummi, allamik allassimasoqanngippat ulloq unnuarlu paaqqinniffik meeraq peqatigalugu aalajangissavaat meeqqap aningasat qanoq amerlatigisut imminut atortassanerai, qanoq akulikitsigisumik tunniunneqartassanersut kiisalu meeqqap aningasartuutit suut nammineq akilertassanerai. Aningasalli atorneqartussat minnerpaamik qaammammut ataasiarluni tunniunneqartassapput.

*Imm. 2. Pisortap nalilerpagu meeraq perorsaanermik pissuteqartumik piffissap ilaani perorsaanermik siunertaqarneq aallaavigalugu aningasanik tamakkiisumik tunineqassanngitsoq, aningasat tunniunneqanngitsut meeqqap aqqa atorlugu aningaaserivimmi kontumi pilersinneqarsimasumut ikineqassapput.*

*Imm. 3. Kaasarfimmiussat atisassarsutiutissalluunniit meeqqap nammineq atugassaatut tunniunneqanngitsut meeqqap atisassaanik assigisaannilluunniit pisineranut atorneqassapput. Aningasat sinnerisinnaasaat meeqqap aqqani kontumut ikineqassapput.*

*Imm. 4. Aningasat imm. 2-mi 3-milu taaneqartuni kontuniittut taamaallaat sulisumit meerarlu ataatsimoorlutik tiguneqarsinnaapput imaluunniit ulloq unnuarlu paaqqinniffimmi sulisunit marlunnit ataatsimoortunik tiguneqarsinnaapput. Tigusinermut uppernarsaat ulloq unnuarlu paaqqinniffiup pisortaanut tunniunneqassaaq paaqqinniffimilu toqqorneqassalluni.*

## Kapitali 7

### *Tikeraarluni angalanerit*

**§ 54.** Kommunalbestyrelsip inissiisimasup tikeraarluni angalanermut atatillugu aningasartuutit tamaasa akilissavai, ilanngullugit ingiaqateqarnermut, nerisaqarnermut il.il. aningasartuutit.

**§ 55.** Meeraq ingiaqateqarani ulloq unnuarlu paaqqinniffimmit feeriarluni angalasinnaanngippat, meeraq angalanerani ingiaqateqartinnejqassaaq.

*Imm. 2. Pisuni ataasiakkaani tamanna pisariaqartoq naliliisoqarpat, ingiaqataasussat ataatsimit amerlanerusut akuerineqarsinnaapput.*

*Imm. 3. Meeqqap feeriarluni angalanissamini ingiaqatissaa nalinginnaasumik tassaassaaq meeqqap ikorfartortigalugulu immikkut attaveqarfigisartagaa imaluunniit allat meeqqap ulluinnarni attavigisartagai.*

## Kapitali 8

### *Atortuulerfia*

**§ 56.** Nalunaarut una 27. novembari 2017-imi atuutilerpoq.

*Namminersorlutik Oqartussat, ulloq 24. november 2017*

Sara Olsvig

/

Julie Præst Wilche

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut